



Inatsisartuni ilaasortaq  
Kristian Jeremiassen, Siumut

## **Pineqartoq: § 36, imm. 1 naapertorlugu apeqquut nr. 2010-263-imut akissut**

Asasara Kristian Jeremiassen,

### **Naalakkersuisunut apeqquut:**

Ilimanami talittarfeqarnikkut qaqugu pitsanngorsaasoqarniarpa?

### **Akissuteqaat**

Aallarniutigalugu Inatsisartunut ilaasortaq Ilimanami umiarsualivik pillugu apeqquuteqarnerani qutsavigerusuppara, tamatumalu peqatigisaanik umiarsualiviit pillugit akissuteqaatiga, 2010-mi ukiakkut ataatsimiinnermi immikkoortoq 57-itut suliarineqartoq innersuutissallugu.

Maannakkorpiaq Ilimanami umiarsualiviup pitsanngorsarneqarnissaanut aalajangersimasunik pilersaaruteqanngilaq. Naluneqanngitsutut Kalaallit Nunaanni umiarsualiviit tamarmik aserfallatsaaliorneqarnissaannut ukiumut 18 millioner koruuningajaat immikkoortinneqartarput. Aningaasat taakku pingaarnersiulluni atorleqartussaapput, taamaalilluni aningaasat taakku annertunerpaamik atorleqarsinnaassallutik. Tassani pilersuinerup qularnaassusaata aamma ilaasut assartorneqarnerisa eqqarsaatigineqarnerat annertunerpaavoq, kisiannili aamma aningaasassaartoqartillugu takornariaqarnermut atortut eqqarsaatigineqassallutik. Taamaattumik Kangerlussuaq ukioq manna ikaartarfimmik puttasumik nutaamik peqalerpoq, taamaalillunilu umiarsuit sinersorlutik takornariartitsisartut Kangerlussuarmi timmisartumut ilaasunut paarlaassisartut periarfissaat pitsaanerulersinneqarput.

Umiarsualivinni tamani aserfallatsaaliuinnermi kinguaattoorutit 80 mio. koruunit missaannik naleqarput. Allaffeqarfiga iliuusissanut pilersaaruserpoq, tassanilu kinguaattoorutit ilaasa siunissami angumeriniarneqarnissaat anguniarneqassaaq. Kisiannili pissusiviusut tunngavigalugit umiarsualiviutitsinnit amerlasuut pisoqaapput aserfallassimallutillu, taamaattumillu ingerlaavartumik aserfallatsaaliuinissamut annertuunik piumasaqaateqarfiullutik.

22. december 2010  
Sagsnr. 2010-042936  
Dok. Nr. 527986

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Kontomi pingaarnermi 87.73.10 Umiarsualiviit 2011-mi aningaasaliissutinik immikkoortitsisoqanngilaq. Naalakkersuisut nunaqarfinni umiarsualiviit ilanngullugit pilersaarusiunnginnerminni, Assartuussineq pillugu Isumalioqatigiissitap Kalaallit Nunaanni attaveqaatinut tamarmiusunut naliliinissaa utaqqiniarlugu aalajangerput. Assartuussineq pillugu Isumalioqatigiissitap isumaliutissiissutaata upernaakkut ataatsimiinnissami tulleermi Inatsisartuni politikkikkut oqaluuserisassanngorlugu saqqummiunneqarnissaa naatsorsuutigineqarpoq. Tamanna tunngavigalugu neriuppunga, attaveqaatini tamarmiusuni tulleeriaarinermut tamakkiisumut Inatsisartut peqataajumaartut – taakkunungalu nunaqarfinni umiarsualiviit piorsarneqarnissaannut aningaasaliisoqassanersoq aamma ilaassaaq.

Inussiarnersumik inuulluaqqusillunga

Jens B. Frederiksen